


Кітап оқудың цифрлық форматы

жастардың қызығушылығын тудыруда

Бүгінде жастар арасында кітап оқу мәдениеті әртүрлі бағытта дамып келеді. Жаңа технологиялар мен цифрлық медиа кеңінен таралған заманда кітап оқу әлі де маңыздылығын жоғалтқан жоқ. Жастар кітап оқу арқылы өздерінің білім қорларын кеңейтіп, рухани дамуларына, шығармашылық ойларын ұштауға мүмкіндік алады.



Кітап оқу мәдениетінде бәсекелестік тудырып жатқан ең маңызды факторлардың бірі — цифрлық форматтағы кітаптар. Электронды кітаптар мен аудио кітаптар жастар арасында аса танымал. Смартфон мен планшеттер арқылы оқылатын кітаптардың ерекшелігі, олар кез келген жерде және кез келген кезде оқуға немесе тыңдауға мүмкіндік береді. Мұның өзі жастардың кітап оқуға деген қызығушылығын оятады.

Жастар арасында фантастика, фэнтези, жастардың әдебиеті және психология жанрлары жоғары сұранысқа ие. Көптеген жастар неғұрлым эмоционалды, әсерлі және қызықты сюжеттерді оқуға құмар. Бүгінгі таңда Гарри Поттер, Сумерки, Рик Риоридің «Перси Джексон» шығармалары сияқты классикалық әдебиеттермен қатар, жаңа авторлардың туындылары да жылдам танымалдылыққа ие болуда.

Ең бастысы, кітап оқудың мәдениеті өзгеруде. Бұрын кітапты тек қана білім үшін емес, сонымен қатар бос уақытты өткізу үшін де оқитын болса, қазіргі жастар оқуды көп жағдайда көңіл көтеру, релаксация, өзін-өзі дамыту

және әлеуметпен байланыс орнату тәсілі ретінде қабылдайды. Көптеген жастар әлеуметтік желілерде кітап оқу тәжірибелерімен бөлісіп, пікірлер жазып, оқыған кітаптары туралы ойларын ортаға салады. Бұл, өз кезегінде өзгелердің де қызығушылығын тудырады.

Қазіргі жастардың дүниежүзілік әдебиетке қызығушылығы артып келеді. Батыс пен Шығыстың үздік классикасы, заманауи жазушылардың туындылары қазақ оқырмандары арасында жоғары бағаланады. Жастардың сыртқы әлеммен байланысты арттыруға құштарлығы, Қазақстанның шығармашылық ортада да жаңа идеялар мен концепциялар қалыптастыруына игі әсерін тигізіп отыр.

Жастардың кітап оқу мәдениетін дамыту үшін мектептердің жоғары оқу орындарының, қоғамдық кітапханалар мен әдеби клубтар секілді мекемелердің рөлі үлкен. Білім беру ұйымдары жастарды кітап оқуға ынталандырып, түрлі әдеби шаралар, кітаптануға арналған чемпионаттар ұйымдастырылуы тиіс. Сондай-ақ, жергілікті жазушылар мен ақындардың шығармашылығын таныстыру — жастардың қызығушылығын арттырудың тиімді тәсілдерінің бірі.

Қазіргі жастар кітап оқуға қызығушылық танытып, түрлі форматтар мен жанрлардағы шығармаларды зерттейді. Оқыған сайын олар өздерінің дүниетанымдарын кеңейтіп, рухани байлығын арттыруда. Кітап — білімнің кілті, мәдениеттің айнасы және жастар үшін жаңа идеялар мен құндылықтарға жол ашатын сара жол. Сондықтан кітап оқу мәдениетін дамыту — біздің ортақ міндетіміз.

Қасиет СЕЙТЖАН,
М.Әуезов атындағы ОҚУ-дың
3-курс студенті.